

Na osnovu Poglavlja IV Odjeljak A. člana 23. (b) Ustava Bosansko-podrinjskog kantona Goražde, („Službene novine Bosansko-podrinjskog kantona Goražde“, broj:8/98, 10/00, 5/03), i člana 106. Poslovnika Skupštine Bosansko-podrinjskog kantona Goražde („Službene novine Bosansko-podrinjskog kantona Goražde“, broj:10/08), Skupština Bosansko-podrinjskog kantona Goražde, na 22. Redovnoj sjednici redovnoj sjednici, održanoj 22. Maja 2013 godine, *d o n o s i*:

## **Z A K O N**

### **O SPREČAVANJU NASILJA I NEDOLIČNOG PONAŠANJA NA SPORTSKIM PRIREDBAMA**

#### **I. OSNOVNE ODREDBE**

##### **Član 1.**

##### **(Predmet Zakona)**

Ovim Zakonom utvrđuju se mjere za sprečavanje nasilja i nedoličnog ponašanja na sportskim priredbama, kao i obaveza organizatora i ovlaštenja nadležnih organa u provođenju tih mjera na području Bosansko – podrinjskog kantona Goražde (u daljem tekstu: Kantona).

##### **Član 2.**

##### **(Definisanje osnovnih pojmova)**

- (1) Sportske priredbe, u smislu Zakona o sportu Kantona i ovog Zakona su sportska takmičenja i sportske manifestacije.
- (2) Organizator sportske priredbe je sportska organizacija sa sjedištem na području Kantona te drugo pravno ili fizičko lice koje se stalno ili povremeno bavi organizacijom sportskih priredbi, odnosno koje je preuzelo organizovanje određene sportske priredbe, ili vršenje određenih poslova u organizovanju sportske priredbe.
- (3) Vrijeme održavanja sportske priredbe, u smislu ovog Zakona, je vremenski period potreban za organizovan i bezbjedan dolazak i ulazak gledalaca u gledalište prije početka sportske priredbe, uključujući i vrijeme trajanja same sportske priredbe, te vrijeme potrebno za njihov siguran i bezbjedan izlazak iz sportskog objekta i odlazak nakon njenog završetka, a čije trajanje u svakom konkretnom slučaju utvrđuje organizator sportske priredbe u saradnji sa Upravom policije Ministarstva za unutrašnje poslove Kantona (u daljnjem tekstu: Uprava policije), prilagođavajući dužinu tog vremena karakteru sportskih priredbi (npr. sportske priredbe povećanog rizika).
- (4) Učesnici sportske priredbe, u smislu ovog Zakona, su sva lica prisutna na sportskoj priredbi.
- (5) Sportski objekat, u smislu Zakona o sportu Kantona i ovog Zakona, je objekat građevina, odnosno prostor (građevinski objekat, odnosno njegov dio ili uređena površina), namijenjen

za sportske aktivnosti, koji može da ima prateći prostor (sanitarni, garderobni, spremišni, gledališni i drugi) i ugrađenu opremu (građevinsku i sportsku).

- (6) Sportski teren, u smislu ovog Zakona, je prostor na kome se obavlja sportska aktivnost koje obuhvataju fizičko vježbanje (obučavanje, trening i rekreativna aktivnost) i sportske priredbe (sportska takmičenja i sportske manifestacije) kao i prostor do gledališta.
- (7) Alkoholnim pićem, u smislu ovoga Zakona, smatra se svako piće koje sadrži alkohol.
- (8) Pod nasiljem na sportskim priredbama, u smislu ovog Zakona, smatra se naročito:
  - a) fizički napad na učesnike sportske priredbe;
  - b) fizički obračun između učesnika na sportskoj priredbi;
  - c) bacanje na sportski teren ili u gledalište predmeta koji mogu da ugroze život, fizički integritet lica ili imovinu;
  - d) oštećivanje sportskog objekta, opreme, uređaja i instalacija na sportskom objektu na kome se održava sportska priredba;
  - e) izazivanje nereda prilikom dolaska, odnosno odlaska sa sportskog objekta ili u sportskom objektu, ometanje toka sportske priredbe ili ugrožavanje sigurnosti učesnika sportske priredbe ili trećih lica.
- (9) Pod nedoličnim ponašanjem na sportskim priredbama u smislu ovog Zakona smatra se naročito:
  - a) neovlašteni ulazak na sportski teren;
  - b) neovlašteni ulazak u službene prostorije i službene prolaze sportskog objekta na kome se održava sportska priredba;
  - c) unošenje u sportski objekat i upotreba alkohola ili drugih opojnih sredstava;
  - d) konzumacija duhanskih proizvoda u sportskom objektu;
  - e) unošenje u sportski objekat, odnosno korištenje pirotehničkih sredstava i drugih predmeta i sredstava kojima se može ugroziti sigurnost učesnika u sportskoj priredbi ili ometati njen tok;
  - f) neovlašten ulazak u dio gledališta sportskog objekta namijenjen suparničkim navijačima.
  - g) unošenje i isticanje obilježja, transparentata, te izvikivanje slogana kojima se podstiče rasna, vjerska, nacionalna ili druga netrpeljivost i mržnja, odnosno čiji je sadržaj uvredljiv i nepristojan, a što može da dovede do fizičkih sukoba navijača ili drugih učesnika te ugrozi život ili integritet lica odnosno oštećenje ili uništenje imovine;

## **II. DUŽNOSTI ORGANIZATORA SPORTSKE PRIREDBE**

### **Član 3.**

#### **(Dužnosti organizatora sportske priredbe)**

- (1) Organizator sportske priredbe, u saradnji sa policijskim službenicima Uprave policije Ministarstva za unutrašnje poslove Kantona (u daljem tekstu: policijski službenici) dužan je da osigura bezbjedno održavanje sportske priredbe i da preduzme mjere kojima se predupređuje i sprečava izbijanje nasilja i nedoličnog ponašanja gledalaca i to:

- a) preventivne mjere;
  - b) redovne mjere koje se preduzimaju na svim sportskim priredbama;
  - c) mjere koje se preduzimaju na sportskim priredbama povećanog rizika;
  - d) mjere koje preduzima Uprava policije.
- (2) Kad sportska organizacija povjeri organizaciju sportske priredbe ili vršenje određenih poslova u organizaciji sportske priredbe drugom pravnom ili fizičkom licu, dužna je da vrši nadzor nad sprovođenjem mjera utvrđenih ovim zakonom.

### **III. SREDSTVA JAVNOG INFIORMISANJA**

#### **Član 4.**

##### **(Odgovornost sredstva javnog informisanja)**

- (1) Sredstva javnog informisanja ne smiju iznositi ili objavljivati stavove uredništva ili svojih novinara, koji izražavaju rasistički ili drugi nesnošljiv pristup prema nekom sportskom klubu, njegovim sportistima i njegovim navijačima.
- (2) Sredstva javnog informisanja ne smiju iznositi ili objavljivati stavove drugih lica, koji izražavaju rasistički ili drugi nesnošljiv pristup prema nekom sportskom klubu, njegovim sportistima i njegovim navijačima, osim ako istovremeno na nedvojben način osuđuju društvenu i zakonsku neprihvatljivost takvih stavova.
- (3) Sportske organizacije će aktima utvrditi sankcije koje će se poduzimati prema sportisti, treneru i članu upravnog tijela sportske organizacije ako su njihovi javni nastupi ili ponašanje prije, za vrijeme ili nakon održavanja sportske priredbe mogli izazvati ili su izazvali protuzakonito ponašanje učesnika na sportskoj priredbi.

### **IV. OBAVEZE GOSTUJUĆEG SPORTSKOG KLUBA**

#### **Član 5.**

##### **(Obaveze gostujućeg sportskog kluba)**

Gostujući sportski klub koji učestvuje na sportskoj priredbi povećanog rizika obavezan je da:

- a) najkasnije 72 sata prije organizovanog polaska navijača na sportsku priredbu obavijesti organizatora sportske priredbe o svim elementima bitnim za prijem kluba i njegovih navijača (dan i vrijeme polaska, procjena broja navijača koji dolaze, način prijevoza, mjesto boravka ili okupljanja, imena vođa navijača i sl.);
- b) ostvari saradnju sa klubom svojih navijača i učestvuje u organizaciji njihovog dolaska na sportsku priredbu;
- c) obezbijedi raspodjelu karata za svoje navijače koje je dobio od organizatora sportske priredbe;
- d) preduzme druge potrebne mjere da klub i njegovi navijači ne budu uzrok nasilja i nereda na sportskoj priredbi.

## V. STANDARDI KOJE MORAJU ISPUNJAVATI SPORTSKI OBJEKTI

### Član 6.

#### (Plan evakuacije i certifikat sigurnosti objekta)

- (1) Sportski objekat mora imati Plan evakuacije koji donosi vlasnik ili pravno lice koje upravlja objektom uz prethodne konsultacije sa Uprave policije, vatrogasnom službom i službom hitne pomoći.
- (2) Plan evakuacije mora sadržavati opisane procedure postupanja u slučaju vanrednih situacija (rušenja konstrukcija, požar, nestanak svjetla, masovni neredi, dojava o podmetnutim minsko – eksplozivnim sredstvima isl.). kao i jedan šematski prikaz evakuacionih koridora.
- (3) Vlasnik sportskog objekta koji je kategorisan kao objekat za međunarodne sportske manifestacije dužan najmanje jednom u toku godine obezbijediti pozitivne inspekcijske nalaze iz oblasti elektro zaštite, gromobranske zaštite, protivpožarne zaštite, opremljenosti sredstvima i opremom za pružanje prve pomoći, higijensko – tehničke ispravnosti javnih toaleta, statičke nosivosti karakterističnih konstrukcija, ulazno izlaznih kapija, koridora i zaštitnih ograda.
- (4) Organizator je dužan da obezbijedi da se sportska priredba povećanog rizika održi u sportskom objektu koji ima:
  - a) odgovarajuće ograde ispred sportskog objekta za usmjeravanje i razdvajanje suparničkih grupa navijača ili mogućnost njihovog postavljanja;
  - b) odgovarajuće ograde za sprečavanje ulaska gledalaca na sportski teren ili mogućnost njihovog postavljanja;
  - c) odgovarajuće ograde za razdvajanje suparničkih grupa navijača;
  - d) odgovarajući broj jasno i vidljivo obilježениh ulaza i izlaza prema svim dijelovima gledališta;
  - e) odgovarajuća sjedišta koja se ne mogu otkinuti samo korištenjem fizičke snage;
  - f) odgovarajući prostor za policijskog službenika, nadležnog za održavanje javnog reda i mira na sportskoj priredbi sa kojeg ima jasan pregled sportskog terena i gledališta;
  - g) tehničku opremu za praćenje i snimanje ponašanja gledalaca na sportskom objektu;
  - h) prostoriju za pružanje hitne medicinske pomoći;
  - i) odgovarajući broj muških i ženskih mokrih čvorova u svim dijelovima gledališta;
  - j) prostor za bezbjedan smještaj prijevoznih sredstava gostujućih klubova;
  - k) sistem javnog razglasa;
  - l) odgovarajuće osvjetljenje ukoliko se sportska priredba održava u večernjim časovima, kao i obezbijedeno neprekidno napajanje električnom energijom.
- (5) Uslove iz stava (4) ovog člana dužan je da ispuni i organizator drugih sportskih priredbi, osim uslova utvrđenih tačkama a), c), f), g) i j) stava (4) ovog člana.
- (6) Bliže uslove iz stava (4) ovog člana i njihovu ispunjenost utvrđuje nadležni sportski savez, odnosno sportska organizacija, uz prethodno pribavljeno mišljenje Ministarstva za obrazovanje, nauku, kulturu i sport Kantona i Uprava policije, svako iz svoje nadležnosti.

**Član 7.**  
**(Sistem javnog razglasa)**

- (1) Sistem javnog razglasa mora biti jasan i jači od buke koju mogu stvoriti gledaoci unutar i izvan sportskog objekta.
- (2) Sistem javnog razglasa ne smije se koristiti za objavu političkih poruka niti za podupiranje domaćega sportskog kluba.
- (3) Kada na sportskoj priredbi učestvuje inostrani sportski klub, organizator sportske priredbe dužan je osigurati da se poruke i upute navijačima inostranoga sportskog kluba upućuju na njihovom jeziku. Organizator međunarodne sportske priredbe dužan je omogućiti predstavniku svakog inostranoga sportskog kluba obraćanje navijačima toga kluba.

**VI. MJERE ZA SPREČAVANJE NASILJA I NEDOLIČNOG PONAŠANJA NA SPORTSKIM PRIREDBAMA**

**Odjeljak A Preventivne mjere**

**Član 8.**  
**(Preventivne mjere)**

U cilju preventivnog djelovanja i smanjenja rizika izbijanja nasilja i nedoličnog ponašanja gledalaca, sportske organizacije dužne su da:

- a) podstiču organizovanje i sportsko (fair play) ponašanje svojih navijača i njihovih klubova;
- b) ostvaruju odgovarajuće informisanje svojih navijača (sastanci sa navijačima, izdavanje biltena i dr.);
- c) koordiniraju aktivnosti sa klubovima svojih navijača prilikom organizovanog odlaska na gostujuće sportske priredbe;
- d) urede sportskim pravilima iz svoje nadležnosti koje se sportske priredbe smatraju visoko rizičnim i koje mjere su organizatori sportskih priredbi i drugi učesnici dužni da preduzmu, u skladu sa zakonom i drugim propisima, na sportskim priredbama visokog rizika;
- e) preduzmu druge mjere i aktivnosti, u skladu sa zakonom, propisima donijetim na osnovu zakona i sportskim pravilima.

**Odjeljak B Redovne mjere**

**Član 9.**  
**(Redarska služba)**

- (1) Organizator sportske priredbe ovisno o vrsti sporta i nivou sportskog takmičenja, vrsti sportskog objekta, očekivanom broju gledalaca te procjeni mogućnosti izbijanja nereda i nasilja, dužan je na sportskoj priredbi osigurati prisustvo redarske službe i dovoljnog broja redara.

- (2) Redarsku službu mogu činiti zaposleni kod organizatora sportske priredbe na poslovima redara, redar dobrovoljac iz reda ostalih zaposlenika organizatora sportske priredbe, član kluba navijača ili drugo lice koje ispunjava uslov za redara predviđen ovim Zakonom.
- (3) Organizator sportske priredbe može za poslove redarske službe koristiti i zaposlene iz agencije za zaštitu ljudi i imovine.
- (4) Pravilima nadležnog sportskog saveza ili drugog sportskog udruženja višeg nivoa, propisuje se minimalan broj redara za svako pojedino sportsko takmičenje, ovisno od nivoa takmičenja i procjeni rizika organizatora.

#### **Član 10.**

##### **(Uslovi za obavljanje poslova redara)**

- (1) Lice koje obavlja poslove redara mora biti fizički i psihički sposobno za obavljanje poslova redara i koje nije osuđivano za prekršaj protiv javnog reda i mira.
- (2) Lice koje obavlja poslove redara u ophođenju sa učesnikom sportske priredbe mora biti krajnje profesionalan i pristojan, spreman na pomoć u svakom momentu, ne smije biti pod uticajem alkohola ili opojnih droga, niti smije iskazivati svoju navijačku pripadnost.

#### **Član 11.**

##### **(Organizacija redarske službe)**

- (1) Redarska služba mora biti organizirana na način koji osigurava da svaki redar zna koje mu je lice nadređeno.
- (2) Ako sportsku priredbu obezbjeđuje i policijski službenik, najviše rangirano lice u hijerarhiji komandovanja biće iz reda policije.
- (3) Policijskom službeniku koji obavlja poslove unutar sportskog objekta u civilnom odjelu organizator sportske priredbe dužan je obezbjeđiti ulaznicu.

#### **Član 12.**

##### **(Obilježja redarske službe)**

Redar mora na odjeći imati vidljivo istaknutu oznaku ili natpis koji označava da je pripadnik redarske službe, pri čemu redar koji je zaposlenik agencije za zaštitu ljudi i imovine, mora nositi uniformu i iskaznicu te Agencije.

#### **Član 13.**

##### **(Dužnosti i ovlaštenja redara)**

- (1) Redari su dužni da:
  - a) štite učesnike sportske priredbe te imovinu koja se nalazu u sportskom objektu,
  - b) utvrditi posjeduje li lice koje ulazi u sportski objekat ulaznicu ili odgovarajuću ispravu izdatu od strane organizatora te spriječiti neovlašten ulazak u sportski objekat,
  - c) utvrditi posjeduje li lice koje ulazi u sportski objekat ili se nalazi u sportskom objektu alkoholno piće, drogu, pirotehnička sredstva, oružje ili druge predmete za nanošenje ozlijeda ili za stvaranja nereda i nasilja te takve predmete privremeno oduzeti,
  - d) utvrditi posjeduje li lice koje ulazi u sportski objekat ili se nalazi u sportskom objektu transparente, zastave, simbole i sl. kojima se iskazuje ili potiče mržnja ili nasilje na

- osnovu rase, nacionalne, regionalne ili vjerske pripadnosti ili neke druge posebnosti i privremeno oduzeti takve predmete,
- e) zabraniti pristup u sportski objekt licu za koje se ocijeni da je pod utjecajem alkohola ili droge ili koje pokušava unijeti u sportski objekt alkohol, drogu, pirotehničko sredstvo, oružje ili drugi predmet pogodan za nanošenje povrede ili za stvaranje nereda i nasilja ili koje je poznato policijskom organu i redarskoj službi kao izazivač nereda;
  - f) zabraniti gledaocima prijelaz iz jednog dijela sportskog objekta u drugi dio,
  - g) zadržati gledaoca koji se nasilno ponaša ili drugačije remeti red i mir na sportskoj priredbi i predati ga policijskim službenicima,
  - h) onemogućiti gledaoce da pristupe u one dijelove sportskog objekta koji nisu namijenjeni gledateljima,
  - i) lica zatečene u počinjenju prekršaja predati policijskim službenicima.
- (2) Isključivo od odredbe stava (1). tačka e) ovoga član, redari neće zabraniti pristup sportskom objektu sportistima koji unose sportsko oružje namijenjeno takmičenju u odgovarajućem sportu ako se takmičenje održava u tom objektu.
- (3) Radi provođenja dužnosti iz stava (1). ovoga člana redari su ovlašteni:
- a) izdati upozorenje i naređenja, pregledati osobu, privremeno oduzeti predmete, utvrditi lične podatke, utvrditi posjedovanje ulaznice, procijeniti prisutnost alkohola u organizmu, zabraniti i spriječiti ulazak u sportski objekat,
  - b) u obavljanju svojih poslova smiju upotrijebiti tjelesnu snagu ako na drugi način ne mogu odbiti istovremeni ili direktno predstojeći napad usmjeren prema sebi, prema gledateljima, prema učesnicima sportske priredbe i drugim licima i ako je napad usmjeren na uništenje ili oštećenje dijelova sportskog objekta i njegove opreme.
- (4) Redari zaposlenici u agencijama za zaštitu lica i imovine i policijski službenici imaju i ovlasti propisane posebnim zakonima.

#### **Član 14.**

##### **(Prisustvo pratećih službi)**

- (1) Organizator je dužan da ostvari saradnju i obezbijedi prisustvo policijskih službenika na sportskim priredbama.
- (2) Organizator je dužan da za vrijeme sportske priredbe obezbijedi prisustvo odgovarajuće službe hitne medicinske pomoći i vatrogasne jedinice kao i da ostvari saradnju, a po potrebi preduzme mjere da obezbijedi i prisustvo drugih nadležnih organa i organizacija, javnih službi i javnih preduzeća (inspekcijske i komunalne službe i dr.).

#### **Član 15.**

##### **(Prijava za održavanje sportske priredbe )**

- (1) Organizator je dužan dostaviti prijavu o održavanju sportske priredbe 72 sata dana prije održavanja sportske priredbe.
- (2) Uprava policije na osnovu prijave organizatora o održavanju sportske priredbe i ocjene relevantnih elemenata o rizicima ugrožavanja stanja sigurnosti i preduzetih mjera organizatora, određuje broj i postupke policijskih službenika koji obezbjeđuju javni red i mir na određenoj sportskoj priredbi.

(3) Obrazac prijave za održavanje sportske priredbe propisuje i donosi Uprava policije.

## **Odjeljak C Mjere koje se preduzimaju na sportskim priredbama povećanog rizika**

### **Član 16.**

#### **(Sportske priredbe povećanog rizika)**

(1) Sportske priredbe povećanog rizika su:

- a) domaće i međunarodne sportske priredbe od većeg takmičarskog značaja;
- b) sportske priredbe na kojima se očekuje prisustvo velikog broja gledalaca ili navijača gostujućih klubova;
- c) druge sportske priredbe kad posebne okolnosti ukazuju da na njima može doći do nasilja ili nedoličnog ponašanja gledalaca.

(2) Koje se domaće i međunarodne sportske priredbe u smislu stava (1) tačka a) ovog člana mogu smatrati od većeg takmičarskog značaja, određuje svojim aktom nadležni sportski savez.

(3) Policijski komesar po zaprimljenom obavještenju od strane organizatora o vremenu održavanja sportske priredbe povećanog rizika, odredit će lice koje će ostvarivati saradnju sa organizatorom sportske priredbe kako bi se mjere iz nadležnosti Uprave policije poduzele blagovremeno i efikasno ovlašteno.

### **Član 17.**

#### **(Dužnosti organizatora sportskih priredbi povećanog rizika)**

(1) Kad okolnosti iz člana 16. ovog Zakona ukazuju na rizik od izbijanja nasilja i nedoličnog ponašanja gledalaca na sportskoj priredbi, organizator sportske priredbe je dužan da:

- a) o tim okolnostima obavijesti bez odlaganja, a najkasnije 48 časova prije početka sportske priredbe, Upravu policije i druge nadležne organe, nadležni sportski savez i druge zainteresovane organizacije u sportu, kao i sportiste koji učestvuju u sportskoj priredbi;
- b) odredi odgovorno lice koje je zaduženo za rukovođenje provođenjem mjera za sprečavanje nasilničkog i nedoličnog ponašanja gledalaca i za saradnju sa Upravom policije;
- c) ostvari saradnju sa Upravom policije radi postupanja po nalogima koji se odnose na obezbjeđivanje javnog reda i mira na sportskoj priredbi i radi obezbjeđenja rada dežurnog sudije za prekršaje;
- d) ostvari saradnju sa predstavnicima klubova navijača u cilju međusobne razmjene informacija i obezbjeđenja da klubovi navijača odrede dio redara na sportskoj priredbi iz svojih redova, radi pružanja pomoći u održavanju reda na sportskoj priredbi i obavještanja gledalaca.

(2) Organizator sportske priredbe u saradnji sa ovlaštenim policijskim službenikom iz člana 16. stav (3) ovog Zakona može prekinuti sportsku priredbu i odrediti da se isprazni dio ili



cijelo gledalište u slučaju masovnog ispoljavanja rasne, vjerske, nacionalne ili druge netrpeljivosti i mržnje.

- (3) Nakon pražnjenja gledališta sportska priredba se može nastaviti ili odložiti u skladu sa važećim pravilima.

#### **Član 18.**

##### **(Zabrana prodaje alkoholnih pića i uslovi prodaje bezalkoholnog pića)**

- (1) Na prostoru sportskog objekta zabranjena je prodaja i distribucija alkoholnih pića u smislu ovoga Zakona.
- (2) Zabranjena je prodaja alkoholnih pića na prilazima i u neposrednoj blizini sportskog objekta tri časa prije i po završetku sportske priredbe povećanog rizika, kao i za vrijeme njenog održavanja.
- (3) Bezalkoholna pića mogu se prodavati i distribuirati samo ako su u otvorenim papirnim, plastičnim i drugim posudama kojima se ne može nanijeti tjelesna povreda.

#### **Član 19.**

##### **(Razdvajanje navijača)**

Organizator je dužan da prije početka, za vrijeme trajanja i po završetku sportske priredbe povećanog rizika:

- a) omogućiti odvajanje grupa gostujućih navijača prodajom ulaznica na odvojenim i posebnim prodajnim mjestima;
- b) omogućiti da se u prodaju puste samo ulaznice za mjesta za sjedenje, odnosno onoliki broj ulaznica za stajanje koji, u zavisnosti od kapaciteta sportskog objekta, ne ugrožava bezbjednost učesnika sportske priredbe;
- c) ostvari saradnju sa sportskim klubovima koji učestvuju u sportskoj priredbi u pogledu prodaje ulaznica za njihove navijače;
- d) odredi posebne ulaze, izlaze i dio gledališta za grupe gostujućih navijača, ukoliko se očekuje njihov organizovani dolazak ili dolazak u većem broju;
- e) obezbijedi preko programa sportske priredbe ili drugih sredstava informisanja podsticanje gledalaca na korektno ponašanje.

#### **Član 20.**

##### **(Zabrana prodaje ulaznica na dan sportske priredbe povećanog rizika)**

- (1) Na dan održavanja sportske priredbe povećanog rizika ulaznice se po pravilu ne mogu prodavati u sportskom objektu na kome se sportska priredba održava ili u njegovoj neposrednoj blizini, već samo na posebnim prodajnim mjestima koje odredi organizator sportske priredbe.
- (2) Uprava policije na osnovu bezbjedonosne procjene može zabraniti prodaju ulaznica na određenim prodajnim mjestima.
- (3) Zabrana iz stava (2) ovog člana utvrđuje se rješenjem koje donosi Uprava policije.
- (4) Protiv rješenja iz stava (3) ovog člana može se izjaviti žalba Ministarstvu za unutrašnje poslove Kantona.

## **Odjeljak D Mjere koje preduzima Uprava policije**

### **Član 21.**

#### **(Mjere koje preduzima Uprava policije)**

- (1) Uprava policije prilikom održavanja sportskih priredbi povećanog rizika može da naloži preduzimanje svih potrebnih mjera za sprečavanje nasilja i nedoličnog ponašanja gledalaca, a naročito da:
  - a) naloži grupama gostujućih navijača kretanje određenim pravcem prilikom dolaska, odnosno odlaska iz sportskog objekta;
  - b) naloži organizatoru sportske priredbe otklanjanje uočenih nedostataka sportskog objekta ili propusta u organizaciji;
  - c) zabrani ulazak na sportsku priredbu, odnosno udalji od sportskog objekta lice iz čijeg se ponašanja može zaključiti da je sklono nasilničkom i nedoličnom ponašanju.
- (2) Uprava policije pred sportsku priredbu povećanog rizika, vrši pregled sportskog objekta na kome će se sportska priredba održati i ostvaruje uvid u organizacione pripreme te osigurava da objekat blagovremeno, u skladu sa važećim procedurama, bude pretražen radi otkrivanja prisustva eventualno podmetnutih eksplozivnih sredstava.

### **Član 22.**

#### **(Troškovi za provođenje mjera)**

Organizator sportske priredbe snosi troškove koji se odnose na preduzimanje mjera iz člana 3. ovog Zakona.

## **VII. NADZOR NAD PROVOĐENJEM ZAKONA**

### **Član 23.**

#### **(Nadzorni organi)**

Nadzor nad provođenjem ovog Zakona vrši Ministarstvo za obrazovanje, nauku, kulturu i sport Kantona i Ministarstvo za unutrašnje poslove Kantona, svako iz svoje nadležnosti.

## **VIII. PREKRŠAJNE ODREDBE**

### **Član 24.**

#### **(Sankcije za prekršaj)**

- (1) Sankcija za prekršaj propisan ovim Zakonom je novčana kazna i zaštitna mjera.
- (2) Zahtjev za pokretanje prekršajnog postupka za prekršaj propisan ovim Zakonom pokreće Uprava policije.

## **IX. KAZNENE ODREDBE**

### **Član 25.**

#### **(Novčana kazna za organizatora i odgovorno lice)**

- (1) Novčanom kaznom od 1.000,00 do 10.000,00 KM kaznit će se za prekršaj sportska organizacija ili drugo pravno lice ako:
- a) ne osigura nesmetano i bezbjedno održavanje sportske priredbe (član 3. stav (1) ovog Zakona);
  - b) ne vrši nadzor nad sprovođenjem mjera utvrđenih ovim Zakonom (član 3. stav (2) ovog Zakona);
  - c) u svojstvu gostujuće ekipe ne preduzme zakonom propisane mjere (član 5. ovog Zakona);
  - d) ne obezbijedi da se sportska priredba povećanog rizika održi na odgovarajućem sportskom objektu (član 6. stav (4) ovog Zakona);
  - e) ne preduzme propisane preventivne mjere (član 8. ovog Zakona);
  - f) ne angažuje ili ne organizuje odgovarajuću redarsku službu iz članova 9. i 11. ovog Zakona;
  - g) dozvoli obavljanje uloge redara licu koje ne ispunjava uslove iz člana 10. ovog Zakona;
  - h) odbije saradnju sa Upravom policije (član 14. stav (1) ovog Zakona);
  - i) ne obezbijedi za vrijeme sportske priredbe prisustvo odgovarajuće službe hitne medicinske pomoći ili ne ostvari saradnju sa drugim nadležnim organima i organizacijama (član 14. stav (2) ovog Zakona);
  - j) ne preduzme propisane mjere kada su okolnosti ukazivale da postoji rizik da dođe do nasilja ili nedoličnog ponašanja gledalaca ili ne postupi po nalogu Uprave policije u vezi održavanja sportske priredbe povećanog rizika (član 17. ovog Zakona);
  - k) ne preduzme propisane mjere prije početka, za vrijeme trajanja i po završetku sportske priredbe povećanog rizika (član 19. ovog Zakona);
  - l) prodaje alkoholna pića suprotno zabrani (član 18. stav (1) i (2) ovog Zakona);
  - m) prodaje i distribuira bezalkoholna pića suprotno predviđenim uslovima (član 18. stav (3) ovog Zakona);
  - n) prodaje ulaznice van odobrenih posebnih prodajnih mjesta (član 20. ovog Zakona);
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 200,00 KM do 2.000,00 KM.
- (3) Za prekršaj iz stava (1) ovog člana fizičko lice koje je organizator sportske priredbe kaznit će se novčanom kaznom od 200,00 KM do 1.000,00 KM.
- (4) Za prekršaj iz stava (1) ovog člana agencije za zaštitu ljudi i imovine će se kazniti novčanom kaznom od 200,00 KM do 1.000,00 KM.
- (5) Pravnom licu kome je izrečena kazna za prekršaj iz stava (1) ovog člana može se uz izrečenu kaznu izreći i zaštitna mjera zabrane vršenja određene djelatnosti.

- (6) Odgovornom licu kome je izrečena kazna za prekršaj iz stava (1) ovog člana može se izreći i zaštitna mjera zabrane vršenja određenih poslova.
- (7) Agenciji za zaštitu ljudi i imovine kojoj je izrečena kazna za prekršaj iz stava (1) ovog člana može se izreći i zaštitna mjera zabrana obavljanja samostalne djelatnosti.

## **Član 26.**

### **(Zaštitna mjera zabrane prisustvovanja sportskim priredbama)**

- (1) Pored zaštitnih i odgojnih mjera propisanih Zakonom o prekršajima Federacije Bosne i Hercegovine, počinitelju prekršaja propisanog ovim Zakonom, a koji je fizičko lice, uz novčanu kaznu može izreći i zaštitna mjera:
  - a) zabrane prisustvovanja određenim sportskim priredbama s obavezom javljanja u policijsku stanicu i
  - b) zabrane prisustvovanja određenim sportskim priredbama s obavezom boravka u policijskoj stanici.
- (2) Zaštitne mjere iz stava (1) ovog člana mogu se izreći u trajanju koje ne može biti kraće od 3 mjeseca niti duže od jedne godine.
- (3) Pravosnažnu odluku o prekršaju u kojoj je izrečena zaštitna mjera iz stav (1) ovog člana, sud dostavlja Upravi policije i nadležnom sportskom savezu koji je o tome dužan obavijestiti organizatora sportske priredbe.
- (4) Licu kojem je izrečena zaštitna mjera iz stava (1) alineja a) ovoga člana, dužna je da se, najkasnije dva sata prije početka određene sportske priredbe lično javi policijskom službeniku u policijskoj stanici prema mjestu prebivališta ili mjestu gdje se zatekao, te ga izvijestiti o adresi na kojoj će se nalaziti za vrijeme trajanja određene sportske priredbe, kao i za vrijeme do isteka dva sata nakon završetka te priredbe.
- (5) Licu kojem je izrečena zaštitna mjera iz stava (1) alineja b) ovoga člana, dužna je najkasnije dva sata prije početka određene sportske priredbe pristupiti u nadležnu policijsku stanicu prema mjestu prebivališta ili mjestu gdje se zatekla, te je dužna boraviti u službenim prostorijama policije ili drugim pogodnim prostorijama do isteka dva sata nakon završetka sportske priredbe.
- (6) Ako lice iz stava (4) i (5) ovoga člana iz opravdanih razloga, radi zdravstvenog stanja ili profesionalnih obveza koje ne trpe odgodu, nije u mogućnosti postupiti u skladu sa stavom (4) i (5) ovog člana, dužna je javiti se telefonom u policijsku stanicu prema mjestu prebivališta odnosno o mjestu gdje se zatekla i izvijestiti o adresi na kojoj se nalazi.
- (7) Policijski službenici su ovlašteni provjeriti nalazi li se lice iz stava (4) ovoga člana na datoj adresi te ako se utvrdi da nije na datoj adresi, a istu pronađe za vrijeme održavanja sportske priredbe, privest će tu osobu u službene prostorije i zadržati najduže dva sata po završetku sportske priredbe.
- (8) Policijski službenici će u službene prostorije Uprave policije privesti osobu iz stava (4) i (5) ovog člana, ako je zatečena u prostoru sportskog objekta gdje se održava sportska priredba i zadržati dva sata po završetku sportske priredbe.

## **Član 27.**

### **(Novčana kazna za fizička lica)**

- (1) Novčanom kaznom od 500,00 KM do 1.500,00 KM, kaznit će se za prekršaj fizičko lice ako:
  - a) oštećuje sportski objekat na kome se odvija sportska priredba, njegovu opremu, uređaje, instalacije i drugi inventar (član 2. stav (8) tačka d) ovog Zakona;
  - b) baca bilo kakav predmet na sportski teren ili u gledalište, ili ometa odvijanje sportske priredbe posebnim tehničkim sredstvima ili drugim napravama (član 2. stav (8) tačka c) i e) i stav (9) tačka e) ovog Zakona;
  - c) neovlašteno ulazi u sportski teren (član 2. stav (9) tačka a) ovog Zakona;
  - d) za vrijeme održavanja sportske priredbe, kao i neposredno prije ili poslije održavanja sportske priredbe neovlašteno ulazi u službene prostorije i službene prolaze sportskog objekta na kome se odvija sportska priredba (član 2. stav (9) tačka b) ovog Zakona;
  - e) za vrijeme održavanja sportske priredbe unosi u sportski objekat ili upotrebljava alkohol ili opojna sredstva (član 2. stav (9) tačka c) ovog Zakona;
  - f) neovlašteno uđe u dio gledališta namijenjen suparničkim navijačima (član 2. stav (9) tačka f) ovog Zakona;
  - g) ne postupi po nalogu službenog osoblja (član 13. stav (1) ovog Zakona);
  - h) konzumira duhanske proizvode u sportskom objektu (član 2. stav (9) tačka d) ovog Zakona;
  - i) postupi suprotno zabrani, odnosno obavezi iz člana 26. stav (1) tačka a) ovog Zakona.
- (2) Uz kaznu za prekršaj iz stava (1) tačka a) - g) ovog člana, fizičkom licu može se izreći zaštitna mjera iz člana 26. stav (1) tačka a) ovog Zakona.
- (3) Za ponovljeni prekršaj iz stava (1) tačka a) - g) ovog člana, obavezno se izriče zaštitna mjera iz člana 26. stav (1) tačka a), dok se licu iz stava (1) tačka i) ovog člana obavezno izriče zaštitna mjera iz člana 26. stav (1) tačka b).
- (4) Ako prekršaj iz stava (1) ovog člana učini maloljetnik, odgovarajuće se primjenjuju posebne odredbe Zakona o prekršajima Federacije Bosne i Hercegovine kojima se propisuje prekršajni postupak prema maloljetnicima.
- (5) Roditelj, usvojlac odnosno staralac maloljetnika mlađeg od 16 godina, koji učini prekršaj iz stava (1) ovog člana, ako je izvršenje prekršaja od strane maloljetnika posljedica njegovog propuštanja dužnog staranja o maloljetniku, a bio je u mogućnosti da takav nadzor vrši, kaznit će se za prekršaj novčanom kaznom u iznosu od 50,00 do 500,00 KM.

## **X – PRELAZNE I ZAVRŠNE ODREDBE**

### **Član 28.**

#### **(Rok za usklađivanje akata)**

Sportske organizacije i druga pravna i fizička lica koja se bave organizovanjem sportskih priredbi uskladit će svoja akta sa ovim zakonom u roku od šezdeset dana od njegovog stupanja na snagu.

**Član 29.**

**(Obaveza donošenja provedbenih akata)**

Obrazac iz člana 15. stav (3) ovog Zakona donijet će se u roku od 3 (tri) mjeseca od dana stupanja na snagu ovog Zakona.

**Član 30.**

**(Ravnopravnost spolova)**

Sve imenice upotrijebljene u ovom zakonu samo u muškom ili samo u ženskom rodu, odnose se na oba spola.

**Član 31.**

**(Stupanje na snagu)**

Ovaj Zakon stupa na snagu osmog dana od dana objavljivanja u "Službenim novinama Bosansko - podrinjskog kantona Goražde".

Broj: 01-02-369/13  
23. maja 2013. godine  
*G o r a ž d e*

**PREDSJEDAVAJUĆI SKUPŠTINE**

*Suad Došlo*